

Ubutumwa Bikira Mariya yahaye Nyiramukiza Valentine ku itariki ya 29/04/2021 Saa cyenda na mirongo ine n'itanu z'ijoro iwe mu rugo - Rue Juliette Whytsman, 4 - 1050 Ixelles.

Bikira Mariya : Nyiramukiza mwana wanjye nkunda, ntega amatwi yombi nkubwire ikinzanye kimbabaje kuri iyi tariki ya 29 y'uku kwezi kwa kane umwaka wa 2021 isaa cyenda na mirongo ine n'itanu z'ijoro ; ku isaha nari naragutegetse wagenderagaho gusenga ku « IHULIRO RY'ABEMERA BOSE » uvuye kwa Kasire na Marita (i Kibeho).

Valentine : Karame, Mama ! Ndi hano ngo unkoreshye ugushaka kwawe, untume aho ushaka kandi nguteze amatwi yombi ngo umbwire ikikubabaje. Ariko binteye ubwoba. Hari icyo ntatunganije se ngo nsabe imbabazi ? Hagiye kuba iki kikubabaje ako kageni Maman ?

Bikira Mariya : Banza untege amatwi wijya kure mwana wanjye. Humura si wowe rwose. Usibye ko ibizaba bizakubabaza nawe n'abandi benshi. Unkundire untege amatwi nkubwire, ntumvugiremo ngo unce mu ijambo. Wumvise ?

Valentine : Yego, Maman, numvise.

Bikira Mariya : Nza kugusura nkakujyana ahari amayirabiri, aho nise « IHULIRO RY'ABEMERA BOSE », maze kuhakura ibyahungabanyaga abana banjye bahanyuraga bakandura bagahumana ibisazi, amashitani n'ibindi bidasanze, icyo gihe nari mbabaye cyane kubera abana banjye b'inzirakarengane bahanyuraga bagiye kuvoma amazi yo koga (b'ishuri rya Kibeho n'abandi).

Nzanywe n'ibi bikurikira :

Mbabajwe cyane na Kiliziya y'u Rwanda igendera mu kinyoma n'ubwoba bw'ibyo bamwe na bamwe basinyiye batanga ibiri iby'abo mu mayeri y'umwanzi washakaga kuyigeza aho igeze ubungubu. Ndavuga ibya Kiliziya Gatolika kuko ifite ibyayo bitavangiwe, bitaburanwa n'ubonetse wese, bihora. Munyumve neza: Mbabajwe na kiliziya ya Paruwasi ya Kibeho nigaragarijemo inshuro zirenze 2 mu mwaka w'i 1982 mbabwira ko nibadasenga ngo bakundane izaba itongo ariko umwana wanjye azakomeza kuyituramo. Ibyabereyemo biteye ubwoba n'agahinda mwese murabizi. Nababwiye ko kiliziya izasenywa n'abagombye kuyubaka, na byo byarabaye na n'ubu bikiba.

Mwana wanjye, ni yo mpamvu nakujyanyeyo barimo kuyitwikiramo abantu ngo ubibone n'amaso yawe kugira ngo utazabibwirwa uko bitari kandi ukabibwirwa n'utarabibonye. Ikindi nagirango uherekeze abawe barimo ngo ujye ubasabira, n'abo mwabanye wakundaga, n'abo nagutumyeho ngo uzamenye uko byabagendekeye na roho zabo ngo uzazimenye uzisabire.

Impamvu nyamukuru ni iyi :

Bafashe umubiri n'amaraso by'umwana wanjye nka ya kanzu ye igihe ajyanywe kwa Pilato. Bayikoreyeho ubufindo. Ibyo ni byo byakorewe ku mubiri n'amaraso bye bitagatifu muri kiriziya ya Paruwasi ya Kibeho basenya Tabernakulo Ntagatifu. Ntibyashiriye aho, kiliziya yagizwe uburuhukiro rw'ibisigazwa by'abana banjye

bazize akarengane n'urugomo batahambwe mu cyubahiro kugeza n'ubu Kiliziya igaceceka.

Ikindi : gusenya ibimenyetso by'aho twahagaze mu igihe twazaga gusura abana i Kibeho Jyewe n'Umwana wanjye Yezu Kristu.

Urugero :

- Aho abana bahagararaga ku rutara Tubabonekera, tunganira bitaga Podium

- Aho niyerekeye umwana wa mbere, bwa mbere mubonekera.

- Aho yari agiye kurira.

- Aho yararaga, aho bahuriraga bose basenga mbere yo kuryama.

Ishusho yanjye yari hafi y' urwo rutara, barayifashe bayishyira mu ngorofani mu myanda barayimenagura n'umujinya n'uburakari buturutse ku rukundo rucye, bitegetswe n'uwihayimana abahagarikiye. Bayijanjugurishije inyundo bayigira ifu, baterera iyo n'uko biribagirana burundu na n'ubu. Kiliziya iraruca irarumira, ariko Njyewe sinabyibagiwe. Mbigusubiriyemo kuko byarambabaje cyane. Yari ibatwaye iki ?

Maze batangira kwamamaza Bikira Mariya Nyina wa Jambo w'i Kibeho.

Abataramubonye n'abatarahageze bamamaza ibyo babwiwe bituzuye, birengagiza ibizima birapfukiranwa babizi kandi babishaka.

Ikindi : amashusho menshi bagiye bayakura mu mwanya wayo ku buryo uzaza ejo n'ejo bundi utarigeze agera yo mbere ntazamenya ukuri nyako n'umwana wavutse nyuma ntazamenya ibyabaye n'uko byatangiyeye n'aho byabereye. Azabwirwa n'iki ko twabasuye ? N'aho mwahagararaga n'aho mwapfukamaga Tubabonekera ? Ni ikihe kimenyetso cy'ifatizo bazareberaho ibyabaye mbere hataragera amajyambere asenya amateka ?

Ndakomeje : Kwanga kwemera kwa Kiliziya no kwihakana umwana wanjye Yezu Kristu bavuga ko atigeze abonekera i Kibeho ngo hatazemerwa abo badashaka. Kugendera mu kinyoma bitwaje ko bihaye Imana, bitwaje ubutegetswe ko icyo bavuze nta wundi ushobora kigisubiraho. Ese koko hakoreshejwe ubushishozi n'ukwemera guturutse kuri Roho Mutagatifu w'ukuri ? Kwemera abantu kurusha kwemera Imana ?

Nje rero kubishimangira ngira nti : « Kibeho ni ahacu kuko twahegurirwe kera bamwe mutarabaho. Nta muntu n'umwe uhafiteho ububasha kuturusha ».

Ikindi nyamukuru kimbabaje cyane mwana wanjye : Uko bateye icumu mu rubavu rw'umwana wanjye hakavamo amaraso n'amazi ni ko banteye icyuma mu mutima bafata icyemezo cyo kunsenyera « IHULIRO RY'ABEMERA BOSE » batazi uko ryubatswe n'impamvu ryubatswe. N'impamvu ari hariya nahisemo nkahashyira ikiganza cyanjye nandikaho « IHULIRO RY'ABEMERA BOSE ». Bumva uwahubatse yarabitewe n'iki ? Ni nde wabimutegetse ? Gute ? Kubera iki ? Bazarisenyana umujinya, ishyari n'urukundo rucye, ubwibone bwo kumva ko bakomeye. Ntabwo ari wowe bazasenyera, mwana wanjye. Ntabwo ari wowe bazasenyera kuko wowe ibyo nagutumye, nakubwiye byarujwe warangije ubutumwa bwawe. Iyo nkota yahinguraniye umutima wanjye numvise uwo mugambi mubi wabo kuko narababonaga, narabumvaga. Ni na byo nakubwiye ko ibikomeye biri imbere. Ni na byo nje kukubwira none aha mbabaye cyane kuko umugambi w'umubisha wujwe ko bazasenyera ejo ku manywa y'ihangu rubanda rwose rureba nk'uko yubatswe

ku manywa y'ihangu. Bazi yarubakishijwe na nde ? Mu buhe buryo ? Kubera iki ? Izasenyeshwa na nde ? Kubera iki ? Azunguka iki ? Amaherezo azaba ayahe ? Ryari ? Iryo hurizo ry'ibibazo nzaribaza Kiliziya.

Ndumva mushaka kureshya na Njye, muribeshya urutugu ntirukura ngo rusumbe ijosi.

Ndababaye cyane pe ! Igicumbi cyabaye icyo kwikurizamo bashaka ikuzo ry'isi aho gucumbikira abakigana birukana uwagihanze bimika nyir'ukwigira cyo. Zitukwamo mukuru ndabarahiye, bana banjye. Nimuce bugufi mwakire ababagana nta burakari, nta kwikuza, nta bwibone maze bahimbazwe no kugana aho nabengutse Jye n'umwana wanjye Yezu Kristu.

Ibyo mbikubwiye mbabaye cyane, mwana wanjye, ngirango nkubwire ko amarira naririye i Kibeho none ejo bazamvisha amaraso bansenyera.

Uzasenyeshya ingoro yanjye « IHULIRO RY'ABEMERA BOSE » ntaho ataniye n'abafashe Umubiri n'amaraso bitagatifu by'umwana wanjye Yezu Kristu muri Tabernakulo zose bakabikoreraho ubufindo, kandi ibiboneka birutwa n'ibitaboneka. Ndababwiza ukuri, banyarwanda bihayimana kuva ku bakuru bakomeye kugeza ku bato, buri muntu mu rwego rwe, abalayiki n'abakristu basanzwe, banyamatorero mwese bakuru n'abato, buri muntu mu rwego rwe, mwese nimuhaguruke murwanye ikibi icyo ari cyo cyose kiri mu mitima yanyu n'iy'abanyarwanda kugirango mukorere Kristu, Kristo mwihaye, mwamamaza, mwemera, mwigisha kuko abenshi ni We mwiyegeye.

Ntabwo yibyaye ndabarahiye ! Nta mwana utagira Nyina umubyara.

Mureke kumusumba ahubwo muce bugufi nk'uko yaciye bugufi akababarira agira ati : « Bababarire ntibazi icyo bakora ».

Nimugere ikirenge mu cye, mureke iby' isi n'ab'isi babashuka bajya kuboreka ahabi h'umwijima.

Nimushikame musenge, mutange urugero rwiza kandi muhamagarire abantu gusenga no gukundana, ubwiyunge n'ubutabera bibe imbuto y'urukundo n'amahoro, maze mukorere ubutagatifu mugifite umwanya wo kwisubira ho.

Musubize amaso inyuma muvugurure Kiliziya n'amasengero kandi musane imitima y'abantu yahungabanye baje babasanga.

Ibya mbere bizaba ibyanyuma, ibyari umugisha n'amahirwe bihinduke umuyonga. Muranyumva neza ?

Nyabuna nimukundane mushyire hamwe, mubabarire, mubabarirane, musabane, ntimuzabe nk'abapagani batamenye Imana.

Mukorere Kristu Umwami n'Umwamikazi w'isi n'ijuru, mwisubireho amazi atararenga inkombe. Nimwunamure icumu, bana banjye, mwiyegeye kuko muri umwe, muri bamwe, kuko mwese ntawe uva amazi, muva amaraso. NK'uko umwana wanjye yavuye amaraso, ariko kuko ari Umwami havuyemo amaraso n'amazi kugirango mukizwe ibyaha byanyu kandi mwuhagirwe ubucakara n'uburetwa bwa Shitani.

Mwibera isi ikigusha ahubwo nimuyibere umukiro n'icyitegererezo cy'ejo n'ejobundi n'igihe cyose.

U Rwanda ni urwa Kristu Mwami n'Umwamikazi. Basumba abami n'abamikazi bo ku isi. Abo ni Yezu Kristu Umwami n'Umwamikazi Bikira Mariya bo beguriwe u Rwanda.

Abasenga na mwe mwikwirara ahubwo nimuve aho mwifungiranye kubera ubwoba umwanzi yabashyizemo. Yezu Kristu yaje kurwanya umwijima ubabundikiye ngo abakize muve mu buyobe muharanire ubutagatifu. Ndashimira umwana wanjye witanze, n'abo bari kumwe nimwihangane. Mbahaye umugisha wa kibyeyi. Mwana wanjye ni icyo cyari kinzanye kukubwira. Ngaho vuga aya masengesho nguhe umugisha wanjye wa kibyeyi.

Valentine : Dawe uri mu ijuru, izina ryawe ryubahwe Ingoma yawe yogere hose icyo ushaka gikorwe munsu, nk'uko gikorwa mu ijuru, ifunguro ridutunga uriduhe none utubabarire ibicumuro byacu nk'uko natwe tubabarira abaducumuyeho, ntudutererane mu bitwoshya, ahubwo udukize icyago. Amina.

Ndakuramutsa Mariya, wuje inema uhorana n'Imana, Wahebuje abagore bose umugisha na Yezu umwana wabyaye arasingizwa, Mariya mutagatifu mubyeyi w'Imana, Urajye udusabira twe abanyabyaha, kuri ubu n'igihe tuzapfira. Amina.

Isengesho ryo gusabira abarwayi : Mana ihoraho ugahanga byose, ni wowe ukiza abakwemera. Turatakambira abawe barwaye, tugirango ubagirire impuhwe, maze nibamara gukira bazaze kugushimira iteka muri kiriziya yawe. Kubwa Yezu kristu Umwamia wacu. Amina.

Isengesho ryo gusabira abatwanga : Mana yurukundo n'amahoro, abatwanga bose Ubakize ibyaha byabo byose, ariko natwe uturinde imitego yabo Ukomeje kubwa Yezu kristu Umwami wacu. Amina.

Hubahwe Imana Data na Mwana na Roho Mutagatifu, nk'uko bisanzwe iteka bubahwe n'ubu n'iteka ryose. Amina.

Bikira Mariya : Nguhaye umugisha wa kibyeyi, Mwana wanjye, Ku izina ry'Imana Data na Mwana na Roho Mutagatifu. Amina.

Komeza amasengesho yawe aho wari ugereje. Wirirwe, Mwana wanjye.

Valentine : Urakoze cyane, Maman, Wirirwe !